

13. august 2021

UKA2021/96

Inatsisartut suleriaasianni § 33 naapertorlugu matumuuna inatsisartunut aalajangiiffigisassatut siunnersuut imaattoq saqqummiuppara:

**Qimussertarneq qimussillu piujuartinnissaat qulakkeerniarlugu, Naalackersuisut ukiuunerani tuttuttassanit qimussimik tuttunniartartunut immikkut immikkoortitseqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartunut Ilaasortaq Doris Jakobsen Jensen, Siumut)

### **Tungavilersuut:**

Neqissaqarniarneq periarfissinniarlugu tuttunniartarneq aamma umimmanniartarneq eqqarsaatigalugit piniarfiusartut ilaat ukiuunerani pisassiiviusarput. Taakkuli ilaatigut qamutit motorillit assartuutigalugit pisassiiviusuni piniartoqartarpoq. Tamannak periarfissaqartinneqarmat ajunngilaq pisariaqarlunilu.

Ukiuunerani immikkut tuttutassanit qimussimik tuttunniartartunut immikkoortitsisoqartalernissaanik siunnersuuteqarpunga. Kulturikkulli pingaartitavut inuussutissarsiornermilu atortuvut, soorlu qimussimik tuttunniartarneq immikkut pisassiiviusannginnerat immikkullu pisassiissuteqartoqarsalersinnaanera aqutissiuutissallugu pissusissamisoortutut isigaara.

Ukiuunerani tuttunniarnernut nunap immikkoortuinut aalajangersimasunut pisassiisoqartalernissaanik una siunnersuut imaqarpoq. Taamaalilluta qimussernikkut ileqqutoqqatta piujuartinnissaanut, kulturikkulli pingaartitatta minnerunngitsumillu avatangiisitsinnik piujuartitsinitta nukittorsarnissaa aallutilissallutigu.

Qimussimik piniarneq piffissami aalajangersimasumuinnaq tungassuteqarmat, motorinik ingerlassutilinnik atuinermut sanillersuuneqarsinnaanngilaq. Siunnersuummi qimussertartut pitsaanagerusunik ukiuunerani tuttunniartarnermut periarfissaqalersissavaa. Taamaattumik siunnersuutip pitsaasumik aalajangiiffigisassatut siunnersuutip oqallisiginissaanut qilanaarpunga.



### **Siunnersuutip aningaasatigut allaffissornikkullu pisortanut kingunerisassai**

Aningaasatigut kingunerisassai naatsorsuutigineqarput suliassamik piviusunngortitsiniarnermut maleruaqqusanillu allannguinermit A/C-p ukiup affaanik sulineratut annertutigisumit annerunaviangitsoq, tamanna 250.000 kr.-inik naleqassassoq.

### **Siunnersuutip aningaasatigut allaffissornikkullu namminersortunut kingunerisassai**

Inuussutissarsiutigalugulu piniarnermut allagartaqartut qimussiutillit ukiuunerani tuttunniarsinnaanermut nutaanik immikkut taakkununga pisassatut immikkoortinneqarsimasutut periarfissaqalertussaapput.

Inuussutissarsiutigalugu piniartut qimusseqanngitsut illuatungaani pisassatigut ikinnerusumik periarfissaqalersinnaanerat nalaanneqarsinnaavoq.

### **Siunnersuutip aningaasatigut allaffissornikkullu innuttaasunut kingunerisassai**

Siunnersuut sunngiffimmi pinialuttartunut qimusseqartullu ukiukkat tuttunniarnissamut akuersissuteqartunut ukiuunerani tuttunut pisassanit immikkut immikkoortitsivigineqartalernissaat sunngiffimmi pinialuttartunut qimusseqartunut iluaqutaasinnaavoq.

Illuatungaani sunngiffimmi pinialuttartunut ukiuunerani tuttunniartartunut ajoqqutaasinnaalluni.